

TEZAU LITURGIC

4 IULIE

ACATISTUL SF. ÎMPĂRĂTESE- MUCENIȚE ALEXANDRA TEODOROVNA A RUSIEI

I



MOSCOVA, 2000



Акафист

царице-мученице Александре

Кондак 1

Избранной от рода державнаго, благоверней царице Александре, яко крепкой заступнице и всеблагой молитвеннице нашей похвальное принесем пение. Ты же, яко имея ко Всещедрому Богу дерзновение от всяких зол и бед нас свободи, да с любовью зовем ти: Радуйся, святая новомученице, царице Александро, молитвеннице о душах наших.

Икос 1

Ангелы своя странам и языком предстатели даровавый Бог, послал есть тя, святая наша мати и царице Александро, в страну Российскую, процвела бо еси в земли сей подвиги твоими, молитвою и кончиною мученическою, и сего ради внити в чертоги Царя Небеснаго спободилась еси, идеже со ангелы предстоиши престолу Господню и молишися о спасении Руси Святой. Мы же вся сия славословяще, от сердце наших таковыя похвалы тебе приносим:
Радуйся, всеблаженная последовательнице Христова.

Радуйся, яко заповеди Его вельми возлюбила еси.

Радуйся, яко закон Христов ревностно и неленостно исполнила еси.

Радуйся, аки светило, во тьме нечестия возсиявшая.

Радуйся, Христу Богу человеколюбцу всю себе предавшая.

Радуйся, благочестием, молитвою и подвигом мученическим Творцу нашему угодившая.

Радуйся, душу свою погубившая, во еже спасти ю.

Радуйся, во славе Святой Троице предстоящая и о державе твоей непрестанно молящаяся.

Радуйся, святая новомученице, царице Александро, молитвеннице о душах наших.

Кондак 2

Видя Господь како сердце твое преисполнилось есть любви к царевичу российскому и како ожидание многолетнее с надеждою велиею претерпела еси, благослови тя и благодатию Своею в таинстве бракосочетания обильно тя одари. Ты, радуясь о Господе, милостию Своею тя посетившему, воспела еси Ему: Аллилуиа.

Икос 2

Разумом Божественным просвещаемая,
богомудрая Александро, не убоялась еси
оставити отечество свое и в державу
российскую
вселитися. Такожде и веру Православную всюю
душою твоею восприяла еси и народ русский
возлюбила еси любовью истинною. Мы
же сему радуясь, ублажаем тя, мати наша и
царице, тако:

Радуйся, добраго корне ветве многоплодная.

Радуйся, от родителей семена веры приемшая.

Радуйся, в страхе Божиим ими воспитанная.

Радуйся, от юности твоя волю Господню
творившая.

Радуйся, в земли российской отчизну новую
обретшая.

Радуйся, яко царем Александром III радостно
сретаема была еси.

Радуйся, яко сомнения и страсти твоя преодолела
еси и многоценный бисер веры Православныя
восприяла еси.

Радуйся, именем древлей царицы-
страстотерпицы нареченная.

Радуйся, яко тоя житию усердно подражала еси.

Радуйся, святая новомученице, царице

Александро, молитвеннице о душах наших.

Кондак 3

Сила благодати Божией осени тя, благоверная Александро, егда купно с супругом твоим, святым царем Николаем венчаны быша на царствие российское. Тоя же сила Божия к милосердию и благочестию осени тя и научи славити Единого Бога, Отца и Сына и Святаго Духа, и воспевати Ему: Аллилуиа.

Икос 3

Имея ум и сердце Духом Святым озаренныя, блаженная царица Александро, свято и праведно жительствовала еси в палатех царстх, паче земной славы о горнем мудрствовала еси, благомудрым пастырем кронштадским и иными духовными наставники руководимая, ко благу и славе Божией житие твое устрояла еси, милосердие бо преславное к народу российскому явила еси.

Мы же, ублажающе труды и подвизи твоя, вопием ти сице:

Радуйся, Матери Божией чадо верное и возлюбленное.

Радуйся, евангельския мудрости вместилище.

Радуйся, яко паче своя, пользы ближних искала еси.

Радуйся, заповедей Христовых усердная исполнительнице.

Радуйся, за ревность о чистоте сердца в нечистоте жития оклеветанная.

Радуйся, во благочестии жити нас наставляющая.

Радуйся, яко разум наш благодатию Господней просвещаеши и озаряеши.

Радуйся, яко к покаянию всех нас ныне призываеши.

Радуйся, святая новомученице, царице Александро, молитвеннице о душах наших.

Кондак 4

Буря скорбей и напастей, злобою мира сего воздвигаемая не ослаби крепкия любве твоея яже к Богу, святая благоверная царице Александро, вся бо с верою и надеждою претерпела еси, в Бозе токмо отраду и утешение обретая и поя Ему: Аллилуиа.

Икос 4

Слышавше боголаженная царице Александро, о чудесех и помощи благодатней, яже получаша правоверние христиане по молитвам старца Серафима, почала еси молиться Саровскому Чудотворцу, да дарует ти и супругу твоему сына-наследника и сотворит мир державе российской. И егда родися царевич Алексей, возрадовалася еси зело и

возблагодарила еси Господа, милость Свою паки ти давшего, и воспела еси пение благодарственное старцу Саровскому. Мы же вся поминающе, зовем ти тако:

Радуйся, всероссийскому прославлению преподобнаго Серафима поспособствовавшая. Радуйся, его молитв ради даров Божиих удостоившаяся.

Радуйся, яко чад твоих и ближних достойно поклоняться святым угодником научила еси.

Радуйся, яко купно с сими святыми от нас славословия ныне приемлещи.

Радуйся, яко купно со Святым Серафимом о спасении нашем присно ходатайствуещи.

Радуйся, Русския Православныя Церкви предивное украшение.

Радуйся, велие к Богу, прославльшему тя за Русь многострадальную дерзновение.

Радуйся, рода христианскаго благомощное заступление.

Радуйся, святая новомученице, царице Александро, молитвеннице о душах наших.

Кондак 5

Божественнаго Духа преисполнена была еси, святая благоверная царица российская Александро, добродетельнаго ради жития твоего: зане кротка, чиста сердцем, терпелива,

непамятозлоблива и вельми милосердна была еси, сего ради и Спаситель во чудесех преславно ты показа. Мы же, прославляя Бога, ты прославльшаго, благодарственно вопием Ему: Аллилуиа.

Икос 5

Видевше ты верные чада церкви Христовой, яко светило безоблачно сияюща многими дарованьми божественными, возрадовахуся зело. Ты же, царица благочестивая, имущая сердце милостивое и к людям страждущим удобь преклонное, делами милосердия и молитвами горячими послужила еси людям державы твоея. Такожде и сугубое попечение о благолепии церковнем имела еси, вся творяще во славу Божию. Мы же, вся сия поминающе, молим тя, святая мати наша Александро, преклони и к нам, многогрешным, милосердие Творца и Спаса нашего и приими славословия сия:

Радуйся, душу ко всем милосердну имевшая.
Радуйся, во мнозех благотворениях любовь к людям показавшая.

Радуйся, состраданием скорби бедствующих утolahвая.

Радуйся, нищая питавшая и убогия призиравшая.

Радуйся, сирая и вдовицы заступавшая и всем просящим помощи помогавшая.

радуйся, яко в обстояниях бызыходных отраду и облегчение даруеши.

Радуйся, яко и ныне предстательства и помощи твояе нас не лишаеши.

Радуйся, святая новомученице, царице Александро, молитвеннице о душах наших.

Кондак 6

Проповедуют о богоугодном житии твоём, святая мати наша Александро, в супружестве и царствовании, добродетели твоя:

веле блгочестие, смиренномудрие, милосердие, истинная матерняя любви ко всем, поющим о тебе Богу: Аллилуиа.

Икос 6

Воссия свет Христов в чадех твоих, благоверная царице, яже тобою научены быша житию добродетельному и тобою же

укрепляемы путь скорбный блгочестно проидоша и тако угодиша Господеви. Мы же, сия поминающе, молим тя, святая

Александро, просвети и наши сердца, мраком житейских попечений омраченныя, озари лучами добродетелей твоих всех, любящих тя и молитвенно к тебе ныне взывающих:

Радуйся, с государем, супругом твоим во всяком благочестии и чистоте пожившая.

Радуйся, и чада твоя во благочестии воспитавшая.

Радуйся, молитве и смирению их научившая.

Радуйся, к подвигу мученическому их предуютившая.

Радуйся, воздержания и целомудрия наставнице богомудрая.

радуйся, супругам любовь и согласие дарующая.

Радуйся, кротких и благих нравов благоискусная насадительнице.

Радуйся, нечестивых и душетленных обычаев неуклонная искоренительнице.

Радуйся, святая новомученице, царице

Александро, молитвеннице о душах наших.

Кондак 7

Хотящим нам славить подвизи и чудеса твоя, святая царица-мученице Александро Новая, помози свыше данною ти благодатию сердца же наша от греховных промыслений очистити, да достойно и неосужденно прославим тя, о тебе воспевая Христу Богу нашему: Аллилуиа.

Икос 7

Новую и дивную заступницу даровал есть ты
Господь людем российским. Ты бо в добродетели
подвизалася еси на земли,
мученически живот свой скончала еси и обрела
еси венец нетленный на небесех. Ныне же
благодать даруеши всем с верою имя
твое призывающим и подвизаеши евангельски
славословити святую память твою:

Радуйся, нищая духом подвижнице, яко твое
есть Царствие Небесное.

Радуйся, плакавшая много, яко обильно
утешилася еси.

Радуйся, яко духом кротости землю обетования
наследовала еси.

Радуйся, алкавшая и жаждавшая правды, яко
насытилася еси в селениях небесных.

Радуйся, милостивая, яко не сама точию
помилована еси, но и иным милости от Бога
ходатайствуеши.

Радуйся, чистая сердцем, яко днесь Бога лицом
к Лицу зриши.

Радуйся, яко возненавидена была еси от человек
и гонения и клеветы прияла еси Христа ради.

Радуйся и веселися, яко мзда твоя многа есть на
небесех.

Радуйся, святая новомученице, царице
Александро, молитвеннице о душах наших.

Кондак 8

Странно бысть маловерным людем российстим чудное житие твое, яко не о славе си, но о Бозе помышляла еси и заповеди Его с любовью творила еси, сего ради и ополчился есть на тя враг рода человеческого со приспешники своими, кии паче иных на тя клеветаху, поношаху и злословляху имя твое честное, ты же по заповеди Христовой за злохулителей своих молилася еси Господеви, песнопоя Ему: Аллилуиа.

Икос 8

Всею душею возлюбила еси народ от Бога ти врученный и во дни испытания военного купно со дщери твоими ольгою и Татианою усердно трудилася еси во врачебнице, воинов раны целяше, не щадила бо еси естества твоего и в немощи телесней силу велию духовную явила еси, служа всем со смирением и любовью. Тем же и нас, грешных, твоею молитвою исцели и буди нам ко спасению управительнице, да благодарственно воспоем ти:

Радуйся, ближние твоя искренне возлюбившая.
Радуйся, спасению их душевному и исцелению телесному себя посвятившая.

Радуйся, болезнующих грехми целительнице

благоискусная.

Радуйся, недугов телесных врачевательнице
богодарованная.

Радуйся, воинам увечным любовью
послужившая.

Радуйся, ангелов милосердием твоим
возвеселившая.

Радуйся, Бога и ближних любить нас
научающая.

Радуйся, страждущим служить нас
подвизающая.

Радуйся, святая новомученице, царице
Александро, молитвеннице о душах наших.

Кондак 9

Всяческие скорби и болезни со смирением и
надеждою на Господа Иисуса Христа претерпела
еси, царице Александро, егда
волею злочестивых богоотступников странствие
скорбное из Петрограда во град Тобольск
совершила еси. Тем же просия
победою вера твоя, яко за все благодарила еси
Господа, не оставившаго тя, супруга и чад твоих
во дни испытаний и пение
хвалебное возносила еси Вседержителю взывая:
Аллилуиа.

Икос 9

Витийския многовещания и риторские хитрости отвергну, искренним точно сердцем в песнях духовных величаем тя, заступницу нашу, благоверную царицу-мученицу Александру, восхваляем многотрудное житие твое, торжествуем славу твою и, поклоняющемся святому образу твоему, умильно глаголем: Радуйся, яко тобою славится Бог дивный во святых Своих.

Радуйся, яко тобою посрамляется отец лжи, диавол.

Радуйся, многими добродетельми путь свой к небеси уготовившая.

Радуйся, слезами скорбьми и покаянием стези твоя оросившая.

Радуйся, радости и славы святых достойная сонаследнице.

Радуйся, блаженства райскаго и света невечерняго сопричастнице.

Радуйся, от горних высот славы твоея к земнородным милостиво приникающая.

Радуйся, нас, чад твоих, матерински посещающая.

Радуйся, святая новомученице, царице Александро, молитвеннице о душах наших.

Кондак 10

Спасительного подвига ищуще, святая
страстотерпице царице Александро, взяла еси
крест Христов и Христу последовала еси,
тесноты, лишения, осмеяния и иные
злострадания терпела еси, на Бога уповая, веру
бо и верность Ему даже до конца явила
еси, песнопоя Господеви ангельскую песнь:
Аллилуиа.

Икос 10

Стена крепкая, козньми врага неодоленная,
пребыла еси до конца, святая великомученице
царице, егда злочестивии
богоотступники купно с супругом, чадами и
слуги верными лютой смерти тя предаша. Мы
же ублажаем мученическую кончину
твою и почитаем тя, яко молитвенницу и
ходатаицу не токмо за страну российскую, но и
за весь мир христианский, и любовь
к тебе подвизаемы, таковыя похвалы приносим
ти:

Радуйся, от рук злочестивых чашу смертную
испившая.

Радуйся, устнами верных сего ради присно
восхваляемая.

Радуйся, веру, надежду и любовь даже до конца
сохранившая.

Радуйся, ум и сердце посреди мучения лютаго ко Господу устремившая.

Радуйся, яко во обителях райских ныне пребываеши.

Радуйся, яко всех с верою имя твое призывающих милостивно утешаеши.

Радуйся, от пагубы и зловерия верных ограждение.

Радуйся, мира христианскаго в вере и благочестии утверждение.

Радуйся, святая новомученице, царице Александро, молитвеннице о душах наших.

Кондак 11

Пение немолчное совершая, предстояще пред образом твоим, царице наша Александро, покаяния молитвы за безумие отцев наших приносим, слезно глаголя: "Господи, даруй им прощение молитвами венценосных мученик Твоих", и на милосердие Отца Небеснаго уповая, сокрушенно поем: Аллилуиа.

Икос 11

Светлостью подвигов благоприятных просияла еси, святая мати Александро, и восприяла еси благодать молиться за ны, вспомоществуя верным в подвиге спасения, яко сосуд избранный благодати Божия. Ныне же

купно с преподобномученицею
Елизаветою, сестрою твоею, государем и чадами
и всеми новомученики российскими
ходатайствуеши о нас пред престолом Царя
царствующих. Мы же вся сия поминаючи,
таковая похвалы тебе, царице Александро,
приносим:

Радуйся, заступнице наша милостивая,
богодарованная.

Радуйся, о вечном спасении нашем молящаяся.

Радуйся, временное благоденствие нам
дарующая.

Радуйся, к сонму новомучеников сопричтенная.

Радуйся, святых благоверных княгинь земли
русския достойная сонаследнице.

Радуйся, святых Православных Церкви
духовная красото и радование.

Радуйся, радости нам и славы вечная усердная
ходатаице.

Радуйся, благих желаний наших скорая
исполнительнице.

Радуйся, святая новомученице, царице
Александро, молитвеннице о душах наших.

Кондак 12

Благодать и велие дерзновение твое пред Богом
ведуце тебе, святая и преславная царице
Александро, молим ти ся: молися о

нас ко Господу, да избавит ны от всяких бед и напастей и сохранит и утвердит ны во святей вере, во всяком благочестии и чистоте, да тихое и безмолвное житие поживем и поем тобою нам благодееющему Богу: Аллилуиа.

Икос 12

Поюще Богу песнь благодарения, радуемся о тебе, святая мати наша, богоблаженная царице Александро, яко вся полезная нам даруеши, тобою бо пагуба отгоняется, здравие улучшается, мир и благоустройство водворяется; понеже бо на небесех присно

ходатайствуеши о нас, взывающих ти сице:

Радуйся, венценосице добропобедная от Христовой десницы увенчанная.

Радуйся, великая угоднице Божия, величием подвигов твоих ангелов удивишая.

Радуйся, чудотворице преславная, в бедах и скорбех страждущим человеком помогающая.

Радуйся, о мире всего мира ко Господу молитвеннице неусыпная.

Радуйся, о спасении державы россиястей пред престолом Божиим выну ходатайствующая.

Радуйся, благочестие и смирение твоими всесильными молитвами нам дарующая.

Радуйся, чтущих память твою пред Богом поминающая.

Радуйся, о прославляющих тя Господа умоляющая.

Радуйся, святая новомученице, царице Александро, молитвеннице о душах наших.

Кондак 13

О преславная страстотерпице, боговенчанная царице Александро, прими благоутробно сие малое моление наше, и твоим сильным и благоприятным пред Богом ходатайством, избави нас от враг видимых и невидимых, от всякия муки, да сподобимся с тобою, царем-страстотерпцем и всеми новомученики российскими во веки воспевати Богу Спасителю нашему благодарственную песнь:

Аллилуиа.

(Сей кондак глаголи трижды, после икос 1 и кондак1)

Молитва первая

О преславная страстотерпице, боговенчанная царице Александро Новая, скорая наша помощнице и заступнице и неустанная о нас молитвеннице.

Предстояще пред образом святым твоим и тя, яко живу сущу, зряще, припадающе, молим тя: приими прошения наша и вознеси их ко Престолу милосерднаго Отца Небеснаго, яко велие и преславное дерзновение к Нему имущая;

испроси всем, притекающим к тебе, и всем, чтущим святую память твою - вечное спасение и временное благодействие, от всяких бед и скорбей - скорое избавление. Ей, чадолюбивая мати наша и царице, тебе, предстоящей Престолу Божию ведомы нужды наша, духовныя и житейския, призри на нас материнским твоим оком, и твоими молитвами отврати от нас колебания всяким ветром учения, злых и богопротивных обычаев умножение; утверди же во всех веры согласное ведение, взаимную любовь и единомыслие; да всем: словесы, писании и дела славится посреди нас Всесвятое имя Отца, и Сына, и святого Духа, Единого Бога, в Троице славимаго и поклоняемаго, Ему же честь и слава во веки веков. Аминь.

Молитва вторая

О святая царице-мученице Александро Новая, милостивая сирых заступнице, крестоносная мати, щедрою твоею десницею озари и нас, тебе ныне молящихся и испроси у Всещедраго и Премилостиваго Бога, Ему же имя есть Любовь, богатыя милости и буди: во браце сущим - чистоты и любве святая хранительнице; чад малых и юности - мудрая окормительнице; сирых и скорбных - жалостивая утешительнице; грехи обуреваемых сострадательная врачевнице;

от врагов искушаемых - крепкая защитнице; и всем твоего заступления просящим - милостивая пред Богом и Царицею Небесною ходатаице; наипаче же умоли, святая мати наша и царице, даровати нам благодать Всесвятаго Духа; да ею в житии сем охраняемы и спасаемы, с тобою сподобимся во веки прославляти Господа и Спаса нашего Иисуса Христа, Емуже слава подобает со Всеблагим Его Отцем и Святым Прещедрым Духом во веки веков. Аминь.

